

## ■ COLUMNA

# Crescher

DA FLAVIA HOBI

**P**li gronds ch'ins vegn, pli gronds problems ch'ins ha.» Quai hai jau mintgatant udì sco uffant. Jau n'hai lura betg chapì quai. Pertge duess in creschì avair ils pli gronds problems che jau!? Gea, in «problem» po esser individuals sco nus carstgauns e per mintgin insatge auter.

**T**ar in uffant èn quai forsa temas, tar in creschì problems finanziaals, tar ils vegls quella u tschella d'olur.

**J**au m'imaginesch che mintgin da nus viva mintgatant sco en ina culla da vaider, mintgin cun ses agens quitads. Ins po bain vesair ils auters, ma da rumper or da sia atgna culla en in'otra n'è betg pussaivel. Tge che va sin il pli è ch'ins sa metta en la situaziun dad insatgi. Na, en sia culla da vaider na dastg'ins betg emblidar tschels e probabel gida quai era da prender pli lev ils agens problems. Sco uffant eran las temas davent uschè spert sco jau hai pudì durmir tar mamma e bab. Era sch'in problem è per in temp qua po el in di svanir. Forsa na sto el gnanc svanir dal tut, però ins po empruvar da vi-



ver cun el, da far il meglier ordlonder.

**I**n zic pudess ins cumparegljar nossa vita cun ina planta. Ina planta resta sia entira vita al medem lieu. Sa chapescha – nus na fashain betg quai. Ma il mutagl da la planta è sco noss corp e noss'olma ch'accumpognan nus tras noss mintgadi. Insatge che nus survegna in gia tar nossa naschientscha, na schizunt schon avant ed insatge ch'i dovra per cuntinuar en il futur. Pli ferm ch'il mutagl è, pli ditg vai fin ch'ins ha resgià enturn el. Era po el avair ragischs fermas, derasadas en differents lieus. Ma forsa sa sentan questas ragischs era simplamain il meglier en in lieu sut terra senza il desideri dad explorar novs lieus. Forsa han era in pèr da nus nossas ragischs en plirs lieus, forsa

be en fitg paucs, perfin be en in.

**S**co in carstgaun crescha ina planta fin ch'ella ha sia grondezza che resta. Cun ils onns creschan er ils roms da la planta, blers e differents roms, sco las experienceschas durant la vita dad in carstgaun. E lura ha la planta adina puspè temp da prosperitad, temp plain fluriziun, cun blera feglia da colur. Durant ils dis megliers perda ella pli pauca feglia, durant ils dis menders dapli. Dentant èsi er in levgiament per la planta sch'ella po laschar crudar la feglia. Quai vul dir che la feglia n'appartegna betg pli ad ella, ch'i è spazi per nova. Era nus stuain far mintgatant plazza per chaussas novas. E cler, ina planta sto tegnair or bler. La pli gronda chalira, ma era afraid mudent, vent criv, schizunt granella che relascha forsa in u l'auter fastiz. Natiralmain vegn la planta era furmada tras quai. E segir ha la planta era muments empernaivels, gea muments bellissims sco sch'el sulegl stgaurda ella la damaun suenter ina notg fraida. Uschè entschaid ella la mintga di senza savair tge che spetga ella, influenzada dal di avant ed averta per quai che vegn.